

أشكي لمين

أوقات بيجي الكسر
من أقرب ما ليك
وبدل ما يجبر كسرتك
بيموتك
وتحس جرحك مرتين
والنزف فيك
ينزف عليك
أوقات تحس الكون يضيق
وما فيش أمل
وما فيش طريق
وتلاقي أقربهم إليك
بخلان بكلمة تبل ريق
ما بقاش زمان الطبطبة

وفر وما تمدش ايديك
مستني أيه؟
مستني مين؟
ما الصورة أهي أدام عنيك
الضرب من أقرب ما ليك!!
طب مين يغطي
ومين يداري
ومين يشد
أنا بشكي منك والا ليك؟
الخوف ملاني
ولسه ليه خايف عليك؟
دا مافيش في قلبي ذكرى حتى اشتاق لها
صفحات قسية وكيلى فاض من عدها!!